



# SIUMUT INATSISARTUNUT ILAASORTAATITAT

16. august 2012

UKA 2012/62

Inatsisartut Suleriaasianni § 33 naapertorlugu aalajangiiffigisassatut siunnersuut imattoq matumuuna saqqummiuppar:

**Sapaatip akunneranik pujortarnaveersaarfimmik pilersitsinissaq anguniaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.**  
(Inatsisartunut ilaasortaq Hans Enoksen, Siumut)

## **Tunngavilersuut:**

Matumuuna Inatsisartunut aalajangiiffissatut siunnersuutigaara nunatsinni pujortartarnerup akiorniarneqarnissaa pillugu sapaatip akunneranik pujortarnaveersaarfimmik pilersitsinissaq, siunnersuutigerusupparalu sapaatip akunnera 15-iusinnaasoq.

Soorlu tamatta ilisimalluarippu imigassartornaveersaarnissaq pillugu sapaatip akunnera 18 atortarippu tamannalu illoqarfinni nunaqarfippassuarnilu atorluarneqartarpooq, sapaatip akunnerani tassani imigassaaq pillugu paasisitsiniaasoqartarpooq peqatigiiffippassuillu aamma susassaqtitsillutik ingerlatitsilluartarlutik.

Inuaqatigiinni pujortartarnerup annertuallaarnera ajornartorsiutigaarput, tamatta peqataaffigisatsinnik pujortartarneq millisarneqartariaqarparput. Ajusaarnarluiinnarpoq meeqqat inuusuttunnguillu minnerunngitsumillu inersimasut assorujussuaq pujortarnermik atuinerat. Taamatut inersimasusuugut meerartatsinnut inuuusuttortatsinnullu isigititsinerput maligassiuerunngilluinnarpoq, taamaattumik meeqqanut inuuusuttunnullu maligassaanerulernissarput pillugu annertuumik sulisutiginnittariaqalerpugut.

Nunatsinni susassaqtut tamarmik innuttaasullu tamatta peqqinnerulernissarput aallunnerusariaqal-erparput. Meeqqat pujortartarnerat asoorulluinnartariaqarpoq! Tassami nalunngilarput pujortartarneq peqqissutsimut uloriarnarluiinnartauusoq, taamaattumik ilungersuullugu siunnersuutigaara pujortarnaveersaartitsinermik annertuumik qaammarsaalluta ataatsimoorfissatsinnik pilersitsinissaq.

Tassalu siunnersuutigaara sapaatip akunnera 15 pilersissagippu tassanilu annertuumik meeqqanut inuuusuttuaqqanullu suliniarnermik pujortarnaveersaartsiffimmik pilersitsinikkut aallartissasugut. Neriutigilluinparara una siunnersuut tamakkiisumik Inatsisartuni Naalakkersuisunilu taparserneqassasoq.

## **Allaffissornikkut aningaasaqarnikkullu sunniutissat:**

Imernaveersaarfik Uge 18 assigalugu Pujortarnaveersaarfik Uge 15 Namminersorlutik Oqartussanut kommuninullu ataasiakkaanut aningaasartuutaanissaa naatsorsuutigineqaassaaq. 2012-mut Inatsisartut aningaasanut inatsisaanni ukiumut 500.000 kr.-nit pujortartarnerup akiorneqarnissaanut atugassatut immikkoortinneqarsimapput.

Tupat akitsuuititigut Landskarsimut isertitsissutaasarnerata annikilleriarnissaq piffissaq ungasinnerusoq eqqarsaatigalugu siunnersuutip malitsigissagaa naatsorsuutigineqassaaq.

**Inuaqatigiinnut sunniutissat:**

Pujortarnaveersaarfik Uge 15-p siunertaaraa inuaqatigiinni pujortartartut ikilinissaat. Inuit ataasiakkaat pujortarunnaarunik cigarette-sisarunnaassapput taamaalillutilu aningaasarpassuarnik sipaarlutik.

Inuit ilaat pujortarunnaarnissartik siunertaralugu iluaquusersortarput soorlu amimut nippitakkaniq nicotin-inilinnik pisisarlutik taamaalillutilu pujortarunnaanissartik aningaasartuuteqarfigisarlugu, siunissarli ungasinnerusoq eqqarsaatigalugu pujortarunnaanermikkut aningaasarpassuarnik sipaartarlutik.

Nunatsinni pujortartarneq pissutigalu kræfteqalersartut amerlapput. Pujortarnaveersaarfip Uge 15-ip eqqunneqarneratigut nunatsinni pujortartartut ikilippata taava aamma pujortartarneq pissutigalugu kræfteqalersartut ikilissapput tamannalu aamma peqqinnissaqarfiup iluani annertuumik aningaasartuutitigut annikillisaataassalluni.